

TLATOCAXTILIZTLAHTOLLI TLEN AXQUIPIYA ITECOH

Ce tlamantli tlahtolli itocah *tlatocaxtiliztlahtolli* pampa quitocaxtia ce macehualli, ce tecuani, ce tlapiyalli, o ce tlamantli. Quemman niquihtoah "nicihuatl", nah nimotocaxtia, huan "cihuatl" notocah. Quemman niquihtoah "xochitl", nictocaxtia ce tlamantli, "ne". Huan ne itocah "xochitl". Oncah ome tlamantli tlatocaxtiliztlahtolli: tlen axquiapiya itecoh, huan tlen quiapiya itecoh.

Tlatocaxtiliztli tlen axquiapiya itecoh quiapiya eyi iachitlahtol: tzinpeuhquetl, tzontlanquetl, huan yollotl. Tzinpeuhquetl huan tzontlanquetl tequiti zancehco para quinextiz ce tlatocaxtilli: macehualli, tecuani, tlapiyalli o tlamantli tlen quiapiya itocah.

Tzinpeuhquetl tlen tlatocaxtilli.

Nochi tlatocaxtiliztlahtolli quihuica tzinpeuhquetl tlen itlatocaxtil. Oncah nahui tzinpeuhquetl. **ni** quihtoznequi nah. **ti** quihtoznequi tah huan tohhuantin. **in** quihtoznequi inmoahuantin. Huan quemman axoncah tzinpeuhquetl, quihtoznequi yah, ne, o inihhuantin. Zan quemman tictlachilia tlahtolli, ticnextizzeah tzinpeuhquetl tlen yah, ne, huan inihhuantin ica \emptyset . Yeca:

Tzinpeuhquetl tlen cetzin: **ni** = nah
 ti = tah
 \emptyset = yah, ne (tecuani, tlapiyalli, ce o miyac tlamantli)
 Tzinpeuhquetl tlen miyaquin: **ti** = tohhuantin
 in = inmoahuantin
 \emptyset = inihhuantin, ne (tecuanimah, tlapiyalmah)

Oncah ce cualantli, pampa **ti** quemmantica quihtoznequi tah (**titlacatl**), huan quemmantica quihtoznequi tohhuantin (**titlacameh**). Nouhquia \emptyset quemmantica quihtoznequi yah ($[\emptyset]$ cihuatl) o ne ($[\emptyset]$ tetl), huan quemmantica quihtoznequi inihhuantin ($[\emptyset]$ tlacameh). Yeca tlatocaxtiliztli quiapiya tzontlanquetl tlen techpalehuiz para axcanah timocuapolozeah.

Tzontlanquetl tlen axquiapiya itecoh.

Oncah macuilli tzontlanquetl tlen quihtoznequi cetzin (ce macehualli, ce tecuani, ce tlapiyalli, huan ce o miyac tlamantli). **tl** motequihuia quemman tlatocaxtiliztli iyollo tzontlami ica ce tlapohtoc caquiliztli (tlaca-tl, e-tl, tli-tl, toto-tl). **tli** motequihuia quemman nopa iyollo tzontlami ica ce tzacuilihtoc caquiliztli tlen axcanah "l" (**oh**-tli, atlac-tli, cin-tli). **li** motequihuia quemman nopa iyollo tzontlami ica "l" (macehual-li, chil-li). **n** zan motequihuia para cequin piltecuanitzin huan xihuitl (michi-n, totili-n, toli-n). Huan oncah zan cequin macehualmeh huan tecuanimeh tlen axquiapiya itzontlanca (oquichpil- \emptyset , chichi- \emptyset , cocho- \emptyset). Oncah ce tzontlanquetl, **meh**, tlen quihtoznequi miyaquin macehualmeh huan tecuanimeh.

Zampa tictlachilizzeah tzontlanquetl tlen axquiapiya itecoh:

Tzontlanquetl tlen cetzin (huan miyac tlamantli): **tl, tli, li, n, \emptyset**
 Tzontlanquetl tlen miyaquin: **meh**

Cetzin huan miyaquin.

Xiquillamiqui: ica nahuatl, zan tzontlami ica **meh** tlatocaxtiliztlahtolli tlen quihtoznequi miyaquin macehualmeh, tecuanimeh, huan tlapiyalmah. Nochi ne cequi, —xihuitl, tetl, huan ceyoc tlamantli—, axcanah quitequihuia **meh**. Moillia, "Ce tetl, ome tetl"; huan "Ce cuahuatl, ome cuahuatl". Quemmantica macehualmeh quihtoah, "Ce xihuitl, ome xihuiameh", o "Ce calli, ome calmah". Huahcauhquiya macehualmeh axcanah zaniloyayah iuhquinon: zan peuhqueh quitequihuiah **meh** ica "miyac tlamantli" pampa iuhquinon zaniloa ica español.

Tzinpeuhquetl huan tzontlanquetl.

Quemman tequiti zancehco tzinpeuhquetl huan tzontlanquetl, ayocanah timocuapolozeah. "titlacatl" huan "titlacameh" tzinpehua ica **ti**, pero nopa **tl** tlen ica tzontlami "titlacatl" techillia que **ti** quihtoznequi "tah". Huan nopa **meh** tlen ica tzontlami "titlacameh" techillia que itzinpeuhca, **ti**, quihtoznequi "tohhuantin." Huan ayocanah techcuapolozeah nopa \emptyset tlen ica tzinpehua "macehualli (\emptyset -macehual-li)", huan "macehualmeh (\emptyset -macehual-meh)". "Macehualli" tzontlami ica **li**: yeca nopa \emptyset quihtoznequi yah. "Macehualmeh" tzontlami ica **meh**: yeca nopa \emptyset quihtoznequi inihhuantin.


Yollotl.

Tlatocaxtiliztlahtolli iyollo techillia tlatocaxtilli itocah. Tlan niquihtoah "niyeyohtli (ni-yeyoh-tli)", **ni** quihtoznequi nah, **tli** quihtoznequi ce tlatocaxtilli (nah) tlen axquiapiya itecoh, huan **yeyoh** quihtoznequi "tlacatl huan cihuatl ininconeuh icihuauh". **Yeyoh** notocah, huan yeca, nah nitlatocaxtilli.

Axcana.

Achitlahtolli, ax-, tlen quihtoznequi "axcana", motzinpepechoa pan tlatocaxtiliztlahtolli.

Tlacopintli: tlatocaxtiliztlahtolli tlen axquiapiya itecoh.



Tlatequiuhiliztli: tlatocaxtiliztlahtolli tlen axquiapiya itecoh, ica nochi itlatocaxtil:

nicihuatl (ni-cihua-tl)	nimacehualli (ni-macehual-li)	nioquichpil (ni-oquichpil-Ø)
ticihuatl (ti-cihua-tl)	timacehualli (ti-macehual-li)	tioquichpil (ti-oquichpil-Ø)
cihuatl (Ø-cihua-tl)	macehualli (Ø-macehual-li)	oquichpil (Ø-oquichpil-Ø)
ticihuameh (ti-cihua-meh)	timacehualmeh (ti-macehual-meh)	tioquichpilmeh (ti-oquichpil-meh)
incihuameh (in-cihua-meh)	inmacehualmeh (in-macehual-meh)	inoquichpilmeh (in-oquichpil-meh)
cihuameh (Ø-cihua-meh)	macehualmeh (Ø-macehual-meh)	oquichpilmeh (Ø-oquichpil-meh)

cuauhmomohitli (Ø-cuauhmomoh-tli)	michin (Ø-michi-n)	chichi (Ø-chichi-Ø)
cuauhmomohmeh (Ø-cuauhmomoh-meh)	michimeh (Ø-michi-meh)	chichimeh (Ø-chichi-meh)

xihuitl (Ø-xihui-tl) ohtli (Ø-oh-tli)

Tequitl:

Xiccuapa cetzin pan miyaquin o miyaquin pan cetzin.

nicihuapil > ticihuapil____	ce pitzotl > ome pitzo____	tiyeyohtli > ____yeyohmeh
ce pahitli > ome pah____	cihuapil____ > cihuapilmeh	____macehualli > timacehualmeh
tlacatl > ____tlacameh	totoli____ > totolimeh	nicihua____ > ____cihuameh

Tequitl:

Xicxehxelo tlahtolli huan xiquihcuilo tlen quihtoznequi iachitlahtol:

inoquichpilmeh	xochitl	cochomeh	conetzin	totolin	eztli
michimeh	yeyohtli	ticocoxquemeh	ticihuapil	ahahuilli	cahuayoh
tlacameh	pitzotl	cihuapiyomeh	tepetl	momachtihquetl	